

Monumentenbureau ta e instancia cu ta prepara proteccion di nos monumentonan

Steenweg 19 indica como monumento proteha

Conforme e ordenanza di Monumento, AB 1991 no GT 46, articulo 4, Minister di Cultura, Sr. Otmar Oduber ta indica por medio di un decreto pa un edificio bira un monumento proteha.

Monumentenbureau ta e instancia di gobierno encarga pa ehecuta e proceso di proteccion. Siman pasa Monumentenbureau a prepara e decretonan ministerial pa edificio Steenweg 19 wordo indica como monumento proteha. E decreto ta wordo manda cu un carta oficial pa e doño(nan), usuario y pa e hypotheek kantoor di DLV y un notificacion lo wordo publica den e Landscourant di Aruba. Despues di seis siman di a sali den e Landscourant e lo por wordo inscribi den e Registro di Monumento.

Actualmente directora di Monumentenbureau Sr. ing. Yvonne Webb-Kock tin bou di su guia Srta. Ichmarah Kock durante su periodo di stage pa logra



su diploma di Master den "Architectuur Geschiedenis". Ichmarah ta e prome yiu di tera cu tin su diploma BA "Kunstgeschiedenis richting Architectuur".

Pa por a prepara Steenweg 19 su descripcion pa indicacion pa monumento proteha mester studia e edificio bon. Un preparacion asina ta tuma varios siman pa investiga, prepara y documenta pa logra cu un edificio monumental keda describi por completo. Asina ta describi exactamente cada fachada y ta pone enfasis riba cada elemento monumental, material, etc. Na mes momento ta studia potretnan bieu, cu ta hopi dificil pa haya, indicando e elementonan pa den futuro considera tambe pa trece nan bek. Ta menciona tambe e elementonan cu no tin balor y tambe elementonan cu mester wordo cambia. Adhunto un potret ora Sr. Yvonne Webb-Kock y Srta. Ichmarah Kock a bay investiga e edificio.

Steenweg 19 ta un edificio cu ta data di 1925 y ta den un estilo di arkitektura neo Barok. Sr. Addison W. Croes a duna Sr. Dada Picus e tarea pa diseña y traha e edificio aki. Dada Picus ta conoci pa su arkitektura na Aruba pa e.o. edificionan manera Cas Eloy na unda nos ta casa awo y ex Papiamento

restaurant. Steenweg 19 tabata conoci como Botica Aruba. E edificio monumental Steenweg 19 ta di un categoria hopi halto dor cu na Aruba no tin hopi edificionan den arkitektura neo Barok. Adhunto tambe un potret bieu di e edificio.

Directora di Monumentenbureau, Sra. Ing. Yvonne Webb-Kock kier a puntra un y tur cu tin potret bieu pa manda nan pa Monumentenbureau. Esaki por wordo haci por medio di nan facebook-page "Monumentenbureau" of por pasa na Monumentenbureau situa na Schelpstraat 36-38, situa net banda di Museo Arkeologico Nacional.

Steenweg 19 lo bira e di 35 edificio pa wordo registra riba e lista di monumento proteha. Monumentenbureau lo publica den seis siman riba nan facebook page "Monumentenbureau" e lista actual di e monumento proteha. E vision di Minister di Cultura, Sr. Otmar Oduber, conhuntamente cu Monumentenbureau ta pa cuminsa rescata nos patrimonio pa despues restaura nan pa nan keda pa nos siguiente generacionnan. □

